

四庫全書

集部

欽定四庫全書

石倉歷代詩選卷四百六十四

明 曹學佺 編

明詩次集九十八

周倫

易州有本亭作

檻泉遶西麓危亭屹東峙飛甍晃晴暈洄光泛朝紫有  
本斯著名長源曷窺溪步屨直方丈仰天幾尺咫靜聽

聲琮瑀渴飲味甘旨遙岑擁螺秀豐草疊茵靡孤花剩  
餘春雙鷗弄清微來撻捧青胎芍藥吐紅嘴隔岸喚遊  
人投竿釣鮮鯉遺祀窈而深狎客坐還起睠茲非通衢  
歟然變芳市駢闐車馬喧闐轉珍奇聚遠人競赴墟鄉  
氓崇恤祀肴蔬分飭餽菁芳事已甌吾儕本霄漢載拜  
向堂祀祝釐信無益祈報騰有理香霧拂輕羅鳴鐘度  
疏綺公暇還自由興來不妨止臨流濯纓紳馴牆閱桃  
李羽士寫高情春盤薦芳芷鴻鵠九天上風月一壺裏

竹馬何翩然杖屨聿萃只和氣盎郊原風光熒塗里雲  
雷空萬變天地第一指相看笑口開不覺塵緣弭愚泉  
意殊薄蘭亭樂堪擬曲水泛流觴岸巾更曳履世態任  
低昂文武自張弛伊昔懷二難於今兼四美懽劇忘促  
席交心戒曲几畏途水泛舟流光磨旋蟻驅策以相從  
奮勵從此始業緒肆刮磨荒茸冀芟蕪晤言抽新貫獨  
行出素履塵市紛其門心田止于水古人有荆軻當時  
眇生死慷慨非中庸齷齪恥餘子

上黨道中夜行

上黨行廿里倒景日西沈  
升岡人上天渡水杠懸沁  
松明火氣馥剝雪寒色侵  
吏從驚吠犬路已村郭臨  
更聲落成樓人定猿鶴噤  
冰花結霜斧夜半啟城禁

澤州察院對雪

人生如塵雪飄飄天壤間  
隨風逐上下踪跡靡所緣  
寄托有妍醜所得皆自天  
瓊霓舞蒼旻巧出神功全  
埃氛條淨盡六合精空懸  
團蓋五松樹矯立霜臺前  
積翠凝

素華寒色相鮮妍豈徒肅霜威亦以占有年升廩市尊  
酒小飲瞻松巔松巔數斗雪一盞詩一篇堂階下鳥雀  
獨坐心泠然

除夕

少小樂新歲老大悲除夕除夕胡然悲夕除不再獲所  
以古昔人靡不重相惜入市無富貧買酒競追適惟有  
天涯心欲遣難自擲思發即千里恍就桑間席相憶徒  
惘然取醉苦量窄

喜雨和未齋殿講韻

長夏招我奕兼以却炎烘我意偶有適九發不一中大  
笑出門去蒸鬱火雲霧偃卧苦煩煊揮箠臂手痛天風  
空滿樓映暘息羣動西照更酷烈文彩散蟠螭掀帳蚊  
蚋集露坐兒女哄長漢復如埽星斗嵌晴空宵暑渴不  
休濡飲進雙鬪一睡五鼓歇忽作羣龍夢雲端隱復見  
呼吼更吟哢翌日霖雨至輕葛背幾凍所欣埃壒清頓  
覺天宇洞憔悴草木蘇生意脩相送昨夢會有徵借以

名雛鳳小雛適洗三蜀錦剪綳控大匠藉外氏剡斲望  
梁棟更煩衍餘澤伊呂見伯仲江帆掛南航臘釀到鄉  
甕聊開湯餅筵酬獻杯竿弄拂袖歌薰風喜劇雜詠諷  
回首原隰秋閭閻免嗟慟

答楊銀臺實夫

華省得高彥道誼端可即睽違苦炎熱書記每相憶因  
擬翠微寺侵晨計登陟適我絆公事躋馬復停勒薄午  
始入山石磴恒喘息諸老已偕至樽俎羅酒食解衣各

就坐虛禮厭繁飾候吏戒遠去各令息足力掀簾覲遐  
景迢遞詎堪測三山接江渚連江亘如翊雲深忽復斷  
萬象筵几逼須臾出畫圖一似曾剪拭漠漠水田白隱  
隱露溝洫誰當擘泰華高下平嶮仄斜日墜林杪飛鳥  
斂歸翼茲遊滌煩暑涼思滿胸臆

送吳廷玉還崑

故人久別離日夕擬相見兩歲期不來虛托雲邊鴈花  
時拾行李動以家事戀秋晚壯遊心百故盡捐遣水浮

更陸走蠶足判鰲面千里倏我即喜極淚欲濺更長燭  
再秉量窄酒空傳兒女身短長粟帛價貴賤官俸聊取  
給世態日改變一一互問答傾寫各爭先攬鏡鬢已華  
開卷眼輒眩為言且款曲試覽帝城遍旬日興未周回  
首條南盼匆匆束歸裝分袂不得援鍾山起寒飈長路  
欲飛霰小吏執壺漿旗亭具盤饌聯鑣出都門祖道指  
鄉縣鄉心逐旌蓋目送孤雲片寄語秋臺兒慰我高堂  
眷明年再及秋挂席江風便

十月二十八日東風

東風振疎林竹樹發寒響喧啾繁鳥雀急若驚  
增網棲心無定枝被雨翮難仗何當埽積霾  
天空月星朗林栖一高舉千里任浩蕩

桃源

桃源二合米買得雙鯉魚漁人不爭價捧米仍  
歛歔試問何為者水發魚却多得魚若不賣奈  
此空腹何腹空猶自忍征斂亂無據明日不得  
魚放船過淮去

春前一日兗州道中逢喻守

驅策自南來路轉充西麓東風吹我衣生意隨馬足臘  
送柳眼青春歸草心綠故人遠相迎延我栢臺宿高論  
接泰岱傾瀉慰襟目撫字陋浮侈催科厭煩瀆借恂應  
不久卧恐虛輟轂若撫平政碑橋邊重應續

再送華泉

驅車出長干放船泝江潮歸雲薄東魯轉柁憑南颿朱  
夏火旗幟烈日燭征旄繫纜遵廣原周行謝波濤回首

世途隘步屨雲山高山中產芝草猿鶴元相招時窺南  
華篇白日從逍遙

聘鶴

我昔遊東園中有孤白鶴翛然結遠思戢羽向林薄豈  
無雲霄志飲啄欣有托我家鶴亦孤嘹唳動寥廓獨立  
念儔侶顧影時錯愕因之賦短章聊以代媒妁不棄海  
門寒知君定然諾

齒落

吾病胃火作一齒浮不著髀動成楚偶爾墜如鑿豁  
然謝觸礙數日苦翻樂嗟此三十六能消幾迴落細矚  
落餘齒與我判然各再置不復牢把弄轉驚愕幸然存  
者多尚可嚙藜藿但嫌素餐久俯首中自忤

省邊圖

夫君朝出田婦女遠供餉時聞北風急臺軍架梁望伐  
木賀蘭巔汲水黃河曲四顧嶺無煙且向溫泉浴

三月三日雨霽登山

春暮日始霽尋幽憩山牀洞壑石衣冷幢幡松雪香界  
寬出遠景鉢淨涵清光悠然倚雲閣極目塵沙場

喜文遠至因寄鄉里諸公

朝來明庶風吹綠官除草花飛錦作裊波暖鳧戲藻衙  
散西堂塵襟淨於灑掃取酌陶吾真詎被春歸惱剝啄  
誰扣門擾我靜來抱置酒擲道書出迂衣裳倒云是故  
鄉來入道家山好長畦麥欲黃高架蠶將老寄語宦遊  
人就社已不早超忽玉峯巔瓜期疏蒼昊豈無狗馬私

鬢髮倏已縞煩君報鄉人鱸肥共幽討

宣賜鮓魚

青山山下江風急下有千尺蛟龍宅漁舟集網未敢擲  
海潮兼天浪花白鮓魚潮落逆流上到此潛遊不知往  
漁人趁潮急下網得魚來來蕩雙槳五月炎蒸擁冰雪  
玉尾霜鱗太鮮潔中璫脩貢千旌子千里馳驅奈騷屑  
天庖六月鮓魚至老臣何幸叨霑賜薦之家廟仍分食  
只愁素飽慚無地

再送南津

石頭城下東流水驪歌未闌江風起  
盧龍飛盡嶺頭雲  
迴望金陵暮烟紫張帆東去水泠泠  
我欲乘船過洞庭  
江北江南坐超忽臨風一笑醉江亭

避暑訓顧東巖

七月七日苦炎熱溽暑蒸人況衰耄  
渴思玉井舊賜冰  
夢遶山陰夜航雪顧君意興今長康  
招我避暑開山堂  
重檐高棟足涼思瓜菓雜飮羅冰漿  
河朔翩翩酒客至

美得四兼難并二山風颯沓解煩熇別是人間一天地  
巖西忽啗半邊日新月當天光又出攜樽露坐月下臺  
月下迢迢望靈匹靈匹爭傳是女牛一水阻隔明河流  
星橋不見烏鵲度萬里晶光河漢秋

五老峰行為沈太守廷材賦

匡廬之巔五老峰中天削出青芙蓉崖光洞靄倏吞吐  
白日雲氣翻虬龍虬龍隱隱流雲亂河漢湯湯五星燦  
時間化作五老人縹緲仙裾離霄漢脩然鬢雪風髮鬢

碧涓雙瞳垂兩儻中有一老笑掀髯光景彈指如峯嵐  
四老離立欲何俟左瞻象緯右地紀日月閒擔藜杖頭  
乾坤幻入瑤簪裏誰其畫者拂縑素髣髴風神帶煙霧  
蒼鹿靈龜舞黃鶴琅玕芝草紛無數五老光寒動南極  
天闕鴻鈞開壽域年來南極躔吳會等閒百歲占耆德  
福州刺史中吳彥八十慈親俱聖善出繼時兼寸草心  
稱觴歸及朝天便彩服依依忽長夏我來稱觴仍勸駕  
慈顏渥丹逼五老況有兒孫堪慰藉弧光照地庭槐綠

鸞書輝映長生錄丈夫養志貴及時會捧星辰調玉燭

題徐士元所藏夏太常竹

貌得高林數竿竹春雨淋漓飽新沃娟娟淨洗斷塵埃  
彷彿藍田迸蒼玉掛壁悠然坐獨看頓令六月生晝寒  
會貪餘陰遍寰宇忽遣煩鬱成歡娛竹裏參差一拳石  
相倚年年度朝夕冰霜不改歲寒心老去孤臣抱忠赤  
太常寫此遺君家不是尋常桃李花  
叩枝翦擲澄潭下  
回首風雷老龍化

夢玄所看菊

遠天長塞鴻鴈飛  
風山木落黃葉稀  
籬邊有菊競金紫  
九十秋光寒不死  
看君持酒餐落英  
下有百尺寒潭清

鴈

自入晉陽道  
關河秋欲過  
樹疎雲影薄  
月滿夜光多  
聲切隣家杵  
寒侵客袂羅  
西風南去鴈  
為落玉山阿

寄何道亨副使

記得曲江邊  
長安逸轡聯  
浮沈忽廿載  
斑白共衰年  
秦

晉官相近荆吳思久懸  
莫嫌雲樹隔書問塞鴻便

獨酌

雅歌回泛想淺酌對芳辰  
三晉巡行地中朝獻納臣  
雨鋪臺下雪苔出砌邊  
塵不盡瞻雲思天涯忽暮春

奉懷少司徒鄭公

朝發鳴騶去西臺不見君  
徑花含曉露簷樹織春雲  
價倍來時重名多去後聞  
錦袍瀛水渡曾復眷河汾

訓宋張二侍御王官谷之作

西晉中條勝王官谷最幽向來期共到何意阻同遊玉  
版傳新調銀鈎慰老眸倚闌貪想像雲樹霍山稠

送薛允潁改判嚴州

長安秋雨過隄柳帶風霜桐水辭家近湘雲入夢長古  
臺雙釣石新檄舊甘棠山郡供輸少催科拙不妨

送余侍御珊謫判安陸

去國秋聲動監州復遠行夢中宮樹渺江上楚雲橫折  
檻名逾重役湘憤未平冰霜自愛惜出入本來輕

送徐錦衣

錦衣南躍馬萬里嶺雲長三月離京國中途是故鄉龍  
光金節重劍氣鐵衣涼聖主綏柔意蠻烟草樹荒

送施天秩還太倉

作詩送歸客客是故鄉人山水幾千里鶯花又一春壯  
心滿天地衰鬢驚風塵何當共江潯白酒紫絲蓴

送周君大赴臨安節判

臨安天萬里十月使君舳舻峽氣停磯浪霜風捲瘴毛過

江鄉路隔望斗驛樓高白下音書僻臨分壑濁醪

送葉判府尚原東還二首

親朋故鄉至秋到忽東歸曉漏催征馬涼飈透客衣分

離歡未洽登覽興多違鎖鑰西關寄虛瞻皂蓋飛

江路烽烟接山城析堦明地中龍虎氣天外鼓鼙聲冀

北已傳蹕淮南未寢兵書生慙戰畧叩首亞夫營

發楊州

揚州已二月寒色帶蕭森夜雨太無賴春風轉不禁驛

船千里夢客路五更心迢遞長江隔雲天鴈字沈

泊清河東張侍御汝立

夜向清河泊風沙日又曛燭光虛牖過樹影細簾分星  
斗遙雙闕鄉關隔片雲寂寥離思劇把酒對微曛

次韻師家莊開

北望任城近沙原有廢村堵高峰穴在屋破燕巢存驛  
舍丁夫急漕舟鼓角喧岸東有僧寺牢落賦雞豚

歸鴈

春半歸鴻急相呼舊侶鳴龍沙矰弋少水國稻梁輕攬  
翮塞雲近排空邊月明無端遠遊子翻失故鄉情

秋夜

秋夜孤燈坐迢迢萬慮賒經年常作客清夢幾還家寺  
迴鐘聲杳窻虛月影斜破愁除是酒僮僕勸應加

東園限韻

春山同晚眺乘興即山陰徑滑露華重月高河漢沈歌  
鐘嘶檻馬林火散溪禽朋舊過逢地園名不用尋

顧野泉夜話

建業親朋過相看喜復驚感時俄廿載話舊欲三更湖  
海蒼烟隔風塵素髮生輸君足幽興雲洞玉泉清

贈張惟廣

兩日風江度輕鑣夜到門別來疑夢寐坐定問寒溫露  
氣涼霑席荷香淨入樽秣陵足遊覽歸計未須論

觀稼二首

野眺登山閣閒情象外添松風清梵宇花雨暗湘簾壁

墮丹青影峰攢紫翠尖今寬九農望穫稻兩秋兼  
山城秋過雨千里淨埃塵場圃登禾黍神祠薦藻蘋催  
科今到骨餓芋久垂津見說陽城守年來澤被民

對雨

衙散忽風雨琴樽獨坐時濕滋牆蔓長寒指檻闕  
茵和雲摘臺蘭趣晚移四郊沾灑徧春意滿畊犁  
野

二月廿九日雨

朝來雨不止薄暮晃新晴萬壑泉爭赴千峰雲亂行鳥

擎林葉重鴨泛水花輕吏隱真投迹篇章取次成

牛首山

牛首城南路聽雞試曉行露霑烏帽重嵐透紫羅輕野  
色花無數山聲鳥異名萬松深處轉洞口白雲平

宿大通港

夜泊大通港迢迢數驛程江流山欲動潮長月初生亂  
磧飛鴻影虛簷警柝聲此時雙闕下兒女話燈明

劉司空南坦王司馬浚川許司寇松臯過訪用

韻

傳報高軒過開窓小設筵寒林喧鳥雀沙竹淡風煙野  
館一樽酒春江萬里船分攜更相憶惠我出郊篇

安德驛路與邊華泉別

捧檄留都去江山總舊遊薇花今共省竹葉暫分舟罷  
奕銀缸淺吟詩碧漢流後來安德水當是別離洲

崇武驛候水

崇武隄邊柳維舟候驛亭月高沙浪白溜減石痕青獨

夜風前漏行蹤水上萍滿溪春漲發篷底雨冥冥

光嶽樓

繫纜臨東郡高樓俯碧潯雲天千里目南北兩都心勝  
槩兼河嶽淳風自古今相逢故鄉客春日共登臨

初秋

秋來山雨過頓覺生微涼綺戶蟾流彩瑤空鴈作行霜  
前巖菊紫風外井梧黃露冕拋紈扇清樽引興長

黃侍郎水亭

舊識春卿館新成水上亭高天秋漢迴斜日暮雲停池  
藻搖窓碧江峰入戶青坐來塵慮淨朝市有巖扃

衛河

清源欣復過幾泊衛河湄倏爾西風作頻將北客吹水  
流多逆浪驛樹少寧枝明日浮雲盡行行近玉墀

十一月六日夜半渡江

渡江潮正發江月看沈西星入金波動煙浮碧漢低霜  
鐘遙水殿漁火近沙谿京口維舟處初聞五夜雞

同王叅議曹少卿登甘露寺

十年甘露約今日赴招邀寺古蒼崖峻雲開紫殿遙江  
流接吳楚山色點金焦日暮鄉關思揚舫候海潮

雨中清涼寺候客

候客翠微隈林深未得來臘樽携綠蟻時雨冒黃梅過  
鳥和雲宿遊僧帶笠回鐘聲高欲霽還遣吏頻催

宿聖像寺

到寺江村暮溪橋出定禪香臺雙樹直油幕一燈圓竹

雨幽鳴玉松風響奏絃  
楞嚴未須誦真覺解玄玄

重憶

重憶南巖下清芬滿架花  
白薇封徑雪紅藥散溪霞  
晝永閒方覺春長興轉賒  
裁詩催故舊同試雨前茶

吳芝山復欲遷居次韻

近來幽興熟步履好頻行  
醉合移春影歌拚轉漏聲  
故啼鶯自在曾惜犬相迎  
不省仍遷次追尋似不情

玉泉亭

停勒西來寺臨池坐石梯錦鮮翻碧藻玉液漱蒼溪竹  
塢犬時吠桑巔雞午啼南山瞻寶叔塔頂與天齊

宿淨慈寺

白日南山轉西湖復此遊六橋隄上路雙棹月明舟玉  
兔波心動青虬水面浮淨慈鐘夜半僧引翠薇樓

東園

雨過東園坐幽清生夏涼日除梧竹影風幔芰荷香止  
渴烹新茗扶衰簡舊方鳴蟬在高樹溽暑頓相忘

卧雲閣

興發登山閣勞忘百尺梯檻前高壁下樹裏遠天低墟  
落花成塢村田錦作畦一觴還一詠遲日未教西

送張司訓爵擢同州學正

馮翊新除命吾邦舊廣文吳船帶海月棧路入秦雲時  
雨關河淨春風草樹薰龍門多秀色沙苑共氤氲

寄東希宋

見說山房勝青蒼少華晴墅開原野潤沙引石泉清渭

水龍光動秦關斗氣橫何時召桓典驄馬更長鳴

寄間同州仲宇

猶記春明路殷勤祖席開風煙一分手雲樹幾登臺盡  
道秦城牧難淹漢署材商原逢過鴈寄我尺書來

西園

買園聊得地日涉未嫌多石磴臨丹井雲崖網碧蘿草  
亭孤嶼際潭水下岩阿客至還觴詠那知鬢髮皤

清源哭懋先叔

清源今修過想像水雲中  
綠岼悲秋草黃埃起暮風  
經年慈閣迴何處旅魂通  
沽釀樽壘在烹鮮簋豆充  
餽投沙渚白燈照紙錢  
紅老淚流還咽淒其獨倚蓬

宴雞鳴寺

殿閣山形轉憑虛俯石欄  
閒悰偶登眺勝界得疎寬  
巒髻青堪綰峰眉翠欲攢  
石圭端士拱沙印細紋刊  
藤蔓懸蒼壁泉飛瀉碧湍  
萬疊分并開半塔渺雲端  
岐虎苔斑潤林龍籜蛻寒  
提壺會朋戚白戰再登壇

贈吳太守惟謙復任叙州

太守遙乘萬里舟，分符仍向古梁州。  
野棠春到涪溪暖，筇竹霜餘鳥道秋。  
五馬曉宣新簡命，萬人懽擁舊君侯。  
才名自昔如山斗，借寇寧能復久留。

送汪進士奏回畢姻

少年三百獨超羣，話別都門風正薰。  
行到長江天接水，度踰高嶺棧連雲。  
杏花穉子偕時彥，桃葉宜人荷聖君。  
對雨忽成燈下別，携家急上再論文。

晴日登山次韻

晴日春山迴翠屏，倚樓吟望不勝情。  
含香花蕾封猶坼，破綠霜蹄止復行。  
午塔影圓潭樹碧，晝燈光動雨花明。  
憑虛正我神遊處，上下江峯萬里晴。

歸承宗近竹亭

數椽茆屋倚蒼峰，萬玉交加百事慵。  
影墮酒罇金鎖鎖，梢橫書幌翠重重。  
杜門不許丹陽造，開徑聊為蔣詡容。  
春雨若投青拄杖，碧潭深處起虬龍。

定州寄曹司務

客裏驅馳頗自安，煩呼童僕慰懸懸。  
定須門戶常深閉，不是家書莫浪傳。  
極目慈顏孤鴈外，許身忠悃五龍邊。  
埋輪攬轡心期在，未說相違動隔年。

栢井驛

匹馬行經栢井鄉，西來風壤異南方。  
輓轡軋軋溪為井，村舍層層土作房。  
曉起入山收樵實，晚來臨澗覓牛羊。  
石扉荊柵無人扣，樹裏兒童出短牆。

有懷黃丹巖

壁間聊爾詠高歌  
高版橋東想薜蘿  
家似鄴侯書更富  
門如陶令客誰過  
江南況味經年別  
塞上烽烟入夜多  
却寄短篇憑問訊  
年來文字價如何

按潞州擬奠李衛公祠不果步次葉文莊公韻  
廿載懷公計謁祠  
潞城追遞未能之  
賸傳召應當年事  
空憶勛名在昔時  
日影駛流冬欲半  
山隈寒勒雪消遲  
梧楸百里烟霞外  
立馬西風攬轡絲

韓尚書貫道惠詩寄謝

歸時疏草塞驢駝  
鞚脫長空一鳥過  
忠鯁已收金匱史  
襟期多付錦囊歌  
身雖去闕時瞻象  
書罷將人不換鵝  
撫卷夕陽翹首處  
羅雲千丈碧嵯峨

十月朔時和姪遺應時菊二本

冉冉秋英照酒卮  
寂寥三徑慰相思  
黃金殿遠色仍近  
綠野堂深香自隨  
已別登臨來隔月  
不知題品自何時  
案頭菊譜名無數  
猶是重陽第一枝

送客

春城客裏送君歸，風物偏驚故國違。  
別意難隨樽酒盡，夢思先逐片帆飛。  
青山相見仍前似，綠鬢重逢比舊非。  
江上張翰好傳示，知音莫道近來稀。

次韻隆禧寺看梅

花到今年又一新，看花還是舊年人。  
夢飛西洛真成幻，笑索東堂却見親。  
橫倚一枝禪榻影，半酣千點故山春。  
深盃明月三更後，誰道天涯客裏身。

白雲山房

春山行看白雲生  
雲白山青夜雨晴  
半日間乘蘇子興  
一空談悟遠  
公情花宮鴈塔隱  
還見斷嶺敲嵯補  
欲平  
深坐夕陽催去馬  
幾時睽榻聽鐘聲

題沈侍御山水之間書屋

塵外青山綠水紆  
水山深處著吾廬  
竹園久與塵囂隔  
松菊真成吏隱居  
接地風聲浮激灩  
倚天峰影照澄虛  
拋書不盡閒居興  
海嶽悠悠意有餘

登報恩寺塔

長干禪塔逼蒼冥，偶共登臨似玉京。  
竹葉酒盃光祿宴，杏花潭水曲江情。  
上方象緯相摩盪，下劫樓臺幾廢興。  
為問前朝僧細說，迢迢西望倚虛楹。

送王寺正訪僉憲西蜀

峽流新漲渺無涯，萬里雲連蜀道賒。  
未盡三春離席酒，行乘八月使星槎。  
懷忠城外瞻祠柏，遣興溪西對浣花。  
訟牒錦官知絕少，君於棘寺況名家。

送制帛

畫閣猶催曉漏聲共迎神帛出留京宮雲擁護旌旗轉  
馳道傳呼鼓角鳴郊廟本嚴周定制登封非為漢虛名  
因思柴望精裡地猶有蠶桑賦未輕

神樂觀會次鄧司徒韻

幽徑霓裳列羽仙仙人煮茗淪幽泉蒼梧翳翳棲鸞樹  
青野迢迢養鶴田棊局對人聊待客笙歌行酒漫巡筵  
山房勝賞消長晝未必桃源是洞天

苦雨

雨過黃梅水滿塘  
野萍隨漲翠浮堂  
藥闌徙倚魚翻鬣  
花徑閒行鶴理裳  
愁借酒杯聊自況  
笑憑碁局竟相忘  
捲簾忽見西山色  
鴉背林梢帶夕陽

清涼寺避暑次吳寧菴韻

殿閣清涼接太空  
薜蘿深處隱花宮  
登臨此日琴樽在  
指點前朝感慨中  
紫霧晝騰鍾阜氣  
滄江時引建康風  
絺衣羽箠堪乘興  
未必東山羨謝公

送朱拱辰還崑

故人千里相逢日公暇時登江上臺  
忽買歸帆向湖海  
可堪羈客送罇罍  
詩中景象憑誰寫  
舍後林扉懶自開  
紫蟹香粳莫深戀  
秋風還擬挂帆來

八月十五夜月

露坐晴空禁漏寒  
仙人飛鏡上雲端  
銀蟾汎汎光流白  
金粟紛紛子落丹  
千里酒盃同潑灑  
萬家華彩各團圓  
寒衣兒女遙南指  
目極征鴻共倚闌

齋居

齋居長日愛幽偏  
筠館清虛更可憐  
碧裊檀烟風細細  
翠搖松影露涓涓  
鴈書塞上何由達  
龍駕雲中定已旋  
夜半漏聲燈月裏  
玉珂天路珮珊珊

壽管儒珍方伯七十

方嶽棲遲楚甸安  
更推高誼早休官  
辭金未道前無震  
爛手緣知後有寬  
松逕試持新玉杖  
荷衣無換舊犀鞶  
橫塘萬樹梅花發  
一醉長春取次看

同鄧司徒飲蔣中丞三友軒次韻

竹陰斜日滿臺青  
席地何煩錦作棚  
翻覆棋枰驚世態  
倡酬詩句話平生  
松風池上聽遊鯉  
梅雨林梢起坐鶯  
漫爾開軒對樽酒  
清和光景歲寒情

送王兵侍質菴致仕

十五題封乞罷官  
再陳方荷聖恩寬  
昔年南北塵初洗  
今日山林夢始安  
村裏人歸添酒伴  
客邊秋及幾花看  
濟時祇恐推耆舊  
矍鑠還須上馬鞍

新晴宴歸次韻

忽收山雨放新晴春宴歸來欲二更  
花炬分移天路迴  
繡袍霑拂露華輕興高未覺良宵永  
詩就何慚太瘦生  
騎入天街徐按轡行瞻宮樹斗杓橫

周承德除養利州守即乞致仕

半百燈窓未放閒一官初檄遂封還  
眼明秋水離丹鳳  
身衣春雲繡白鵬天地塵埃人世外  
江山風月笑談間  
迷途自訝為官在兩鬢年來已漸斑

送洪弘齊都憲考最北上

鎮重留都奏最時正逢仙仗賜鳩期霜威坐見臺烏凜  
野興行將海鶴隨語燕風檣春渡穩遊絲晴旆午光遲  
廟堂此日珍耆舊泉石何勞起夢思

己卯還自留都九日同顧孔安李仁山并兒子  
鳳鳴登卧雲閣次韻

謝却塵途半日忙卧雲同上舊遊堂憑虛樹杪江光見  
返照峰前塔影長笑整危冠籠晚鬢醉將衰面助春陽

十年九日千山外何處親朋共此觴

燈下賞菊

更漏沈沈客滿筵旋移黃菊素屏前即開尊酒聊乘興  
亂發燈花若鬪妍看去醉疑蒙紫霧折來香欲動華顛  
相看記得長安夜對影題詩又五年

渡江

鉦鼓聲高江雨收錦帆輕颺渡江舟金焦不負青春色  
天漢遙分碧海流旅夢烟霄雙過鴈虛名天地一浮鷗

朝來無限瞻雲思幾度回看北固樓

登歌風臺

歌風廿載登臺興此日還停北上船  
沛井尚存終自冽漢碑中斷已重鐫  
白沙碧草猶春色落日荒亭幾暮煙  
總道當年思猛士韓良何事學神仙

送張都憲敬亭還宣城

解組歸來欲避名翻傳輿廩下承明  
興從泉石詩俱逸身遠塵囂夢亦清  
疊嶂峰前春樹渺黃金臺下曙雲平

謝家蘭玉森森起回首猶餘報主情

大理寺芍藥次韻

繫馬槐陰午未歸翻階紅藥正芳菲  
開簾白日影搖座繞砌和風香襲衣  
采石載將醪正美東甌携得蟹仍肥  
從容退食還賡詠棘寺門閒訟牒稀

一雲次王守谿閣老韻

石磴崔嵬路折旋崎嶇歷盡是平田  
高林忽送催詩雨深澗遙分悟道泉  
僧為知名如舊識地疑曾到豈前緣

萬竿修竹參天起欲借琅玕紀歲年

天平山

十年不到天平寺雲白秋清山更奇  
落木聲中森萬笏古臺高處有穹碑  
鳴鐘未入支郎院下馬先瞻范相祠  
祠下雲泉流不住悠悠千古動遐思

卧病得鳳鳴家書

直北關心病卧時無端消息儘堪疑  
白鴻一聲叫已急黃犬何處來翻遲  
雷雷昨夜忽復靜雨露茲晨還自乘

沈疴浹月頓覺解寬紙起坐題新詩

遊清涼寺二首

樹裏僧鳴客到鐘翠微深處繫青驄九天日月瞻依外  
萬井烟花指顧中王氣春園丹鳳闕卿雲時護紫霄宮  
省臺無事休衙早此日登臨有數公

春日春山偶出遊山扉晨啓徑松幽花宮日麗金輪轉  
鷺嶺雲開畫拱浮潭影浸空高塔午泉聲吹雨半林秋  
澄江萬里鯨波靜碧柳青蒲銷戰舟

江巡曉行

繚繞江流逐岸斜  
西來巫峽海東涯  
竹簾篷戶船船月  
山館雲亭處處家  
波淨試搖天上櫓  
風恬真隱浪前花  
天邊絳節予方領  
銀漢如乘八月槎

過東梁山西梁山

東西萬古石梁存  
潮落潮生幾處痕  
一水中流通鷁棹  
兩山相向過龍門  
樓臺依約高藏寺  
煙樹迷茫下有村  
風便未登聊問俗  
詩成祇自引壺尊

閱視水操

龍江閱視水軍營十萬貔貅畫鷁輕鳥陣雲盤秋宇淨  
鯨波風定早潮平三山遙接旌旗動五夜初嚴鼓角聲  
野色漸分天欲曙扶桑東望紫霞橫

秋夜

一池霜後淨無萍影落雲天萬里明  
敲柳漸疎風外影  
過鴻遙曳塞邊聲螢光篝火寒無燄  
蛩語機絲懶亦驚  
底事夜來清不寐月明鈴柝震高城

次答靜齋巡撫見寄

池上秋生樹杪聲  
匆匆夜席話君行  
青尊擬罄三山酒  
白日孤懸萬里情  
五兩風帆心共遠  
九華雲物思俱平  
舟從采石樓前過  
傾圯猶餘太白名

紅心驛

行行長路夕陽催  
望望紅心探馬來  
臘意未舒堤上柳  
春光先著隴頭梅  
青烟林匝樓烏下  
白雪坡盈獵騎回  
兩日和風上貂帽  
壯顏無待玉壺開

利國監驛

坐倚南窓對鐵山鐵山無冶舊名間譙樓驛舍孤村外  
滕國彭城兩界間塵路峻嶒天漠漠石梁敲斷水潺潺  
何人為國輸籌策冀馬重開十二閑

十一月廿六日拜南刑部次月廿七日陞辭寓

曹氏園亭

霜天未解潞河水暫向城南一駐旌雲漏尚驚高闕報  
風埃聊對野塘清不將門帖通臺省漫有詩篇記姓名

時枉諸公遙問訊天涯誰道近春明

南寺讀毛文簡詩有感

舊遊曾記榼般疏屈指重來十載餘  
珠樹玉梅春似昔野情僧面老猶初  
畫文墨皆陳迹青草蛟螭總漫墟  
莫笑隨緣西竺語一茶清世有誰如

衛河懷陳僉憲

清源秋夜下長河獨客孤舟月色多  
濁酒未緣傾宿好高才那得聽新歌  
南都夢繞同臺署東闕天教接珮珂

忽憶毘陵舊分袂薰風回首廿年過

重到法司

貫城門迴未須尋光景依稀昔似今楊柳綠乘春路遠  
薇花紅放午堂深無邊躍鯉翻清沼不斷鳴鳩喚紫林  
何意重來圖畫裏丹年無補愧初心

九日

九日郊原喜放晴黃雲滿地正秋成松山落葉隨風下  
花徑浮香逐馬行遠水接天開四界高林棲寺隔重城

醉來移席冠猶整  
安得風流似孟生

官舍

官舍真兼吏  
隱清遶高樹  
水泠泠嘉賓不厭頻  
携酒別院猶堪小  
結亭天際青山排闥至  
花間黃鳥枕書聽  
省堂多暇休衙早  
遲日春風靜掩扃

東園燕集用前韻

一庭風雨送新寒  
公子留賓欲盡歡  
深酌黃金行酒竿  
俄傳白玉送春盤  
城頭夕漏頻催柝  
燭下歌鐘巧弄丸

命駕要歸歸未得  
巢盧相博興還寬

病中書懷再用前韻

病餘雖較怯風寒  
坐擁爐薰也自歡  
卧篆木魚誰剥擊  
閉門窓虎獨迴盤  
青囊解縛收詩草  
碧瓠隨題簡藥丸  
風色湖山還好未  
雲司三日簿書寬

寄陳相鶴

重憶山人閒到老  
移居又住玉山西  
塵囂不到青松杪  
鷗鳥常來白石溪  
醉敝絺衣朱鶴伴  
笑簪高帽玉鳩齊

予歸擬結談詩社是處登臨要品題

焚黃值雨雪

夜來春色到山家  
賁及林邱改物華  
五殿未緣酬一得  
九原何意寵三加  
千峰雨合膏為潤  
萬里雲同玉作花  
黃燎音容在何處  
空餘涓滴酌茅沙

過彭城

洪濤一過彭城下  
漠漠烟沙白鷺汀  
水落漫無平野綠  
山園不斷半天青  
子房直往祠前渡  
司馬難從洞口經

一夜老夫眠不去推篷落落數星明

九日隔風天津

滿江風浪正重陽船泊天津接大洋北望煙沙宮樹渺  
東來鳬鴈海雲蒼霜螯入市肥堪饌臘蟻開尊醉不妨  
回首吳山黃菊在幾時能學孟嘉狂

阻風良店驛

南征十月對南薰良店樓遲思欲焚播弄檣烏塵磧起  
浮沈水鳥浪花分一杯細引寒船月千里遙懸煖閣雲

縮地無緣南北去兒孫聊復慰殷勤

雨後入關望都門

丹陽百里入關來雨後衝泥險道迴隴麥畦畦霑土濕  
山花種種向人開簷邊乳鵲將雛至樹裏鳴鳩喚婦回  
七里高岡更西望春雲縹緲鳳凰臺

三疏乞休伏奉俞旨用韻有述

九天昨日降黃麻老得辭官興轉賒何處紅塵迷客路  
一江清漲到儂家有棋儘可消長晝無柰能催赴早衙

掉背出門那得礙君恩難道不堪誇

中秋日秋汀歸田諸老見過

金風忽動野堂秋  
梧竹蕭蕭爽氣浮  
可待月來光正滿  
偶逢賓至雨初收  
盤殮江上鱸堪市  
尊酒牀頭釀已篋  
分付兒童掃松徑  
露臺高處恰登樓

秋夜

秋夜飛螢拂樹明  
水邊深坐葛衣輕  
金風頓覺塵襟淨  
玉露還同野思清  
小院梧桐流月影  
半窓燈火讀書聲

何人苦被浮名累車馬翩翩欲二更

十四日立春荅高歸田見寄

明夜上元今日春春風今歲太逡巡正傳生菜盤行玉  
還看燈花燭貯銀令節併臨增勝事小筵頻啓對芳晨  
獨慚郢調難為和滿院瓊瑤雪色新

瓶梅結子

南巖攜贈一枝梅插向瓷瓶土不培冉冉幽香浮几案  
青青嘉實自根荄玉盤未足瓊瑤薦金彈翻令燕雀猜

回首和羹虛鼎鼎不須移向日邊栽

待月次韻

移席風亭月漸高半開冰鏡半雲濤  
舉杯欲便隨秋浦作賦何能似水曹  
一曲闌山心自遠數莖衰白鬢空搔  
坐深不覺歸來晚玉露涼生透錦袍

石湖上方寺

湖上名山紫翠中上方鐘梵有琳宮  
林浮錦樹山光發水落滄江海氣通  
雙洞鉢龍收夜雨九霄笙鶴任秋風

向來簪弁都拋却已覺禪心萬劫空

鄧尉山房

行看一水來天目坐見千峰湧太湖啼鳥不知遊客至  
閉闔惟有定僧孤鏡中水月俱清寂象外烟雲乍有無  
勝地久懷來較晚買山真欲辨青蚨

挽張直芳

張君拜官如謫官柳州之南行復南荒服聖朝深雨露  
瘴江終日自煙嵐長途旅櫬情何極落日啼猿聽不堪

淚掩寒原歌楚些滿林松檟碧相參

天燈

入雲華表綴春燈落落浮光破晦冥遊徑未須檠樺燭  
照書何必聚囊螢碧紗窓迴臨秋月畫閣簾開晃夜星  
漏斷六街人跡靜北窓猶自讀遺經

至日

歸來至日三年過物色年來好應期紅著江梅初點點  
黃肥園橘尚垂垂五紋旋續針頭線半局能添指下棋

忽報前星照天下一陽來復正當時

戊戌元日試筆

賜歸天下降黃麻忽漫今經五歲華  
曙日樓臺收海霧早春梅柳淨烟沙  
試揮霜管新裁句細汲山泉旋煮茶  
兒女滿前高宴會玉尊金勝頌椒花

鳳鳴五十

建議但知當日是升沈那復悔前非  
行藏如此顏何厚心事無端笑獨違  
特遣罷官辭殿陛翻令供職到庭闈

百年弧矢春同醉不厭茅堂隱竹扉

寄題纓溪草堂

背郭高林開草堂堂前潭水即滄浪鷗鳬泛泛澄波靜  
雲石泠泠白晝長試濯冠纓歌孺子却疑圖畫對瀟湘  
仙郎莫負澄清志塵海烟沙正渺茫

翠微閣

病足登臨老更艱人扶闌曲費躋攀憑虛試眺前年景  
移席重看舊日山風閣崔嵬雲外遠雨樓岑寂翠微間

明朝晴霽還須到分付禪僧莫閉關

登新樓

一上新樓百摺梯捲簾蒼翠玉峰齊天光照落書邊幌  
海氣潮生檻下溪荏苒烟霞通宇宙逶迤城郭見東西  
千年身世青霄際何必桃源訪路迷

王君美林亭看梅

底事春來日日陰強移棲息就花深行經薄霰穿香徑  
望隔寒雲帶碧岑水面仙裾來似夢城頭羌笛杳無音

自今幽興林亭熟再過肩輿不用尋

獨坐

老來身世澹無營獨坐虛堂萬慮清  
看溪雲兼樹靄細聽泉溜帶江聲  
喜貪書卷慵仍擲量怯壺樽淺亦傾  
見說仙家閒不去也消長日對棋枰

五日雪

薄海寒雲釀雪飛逶迤城堞玉龍圍  
蝗知入地深無數柳見乘絲凍覺肥  
春甕未開浮蟻動冰澌初解泛鷗稀

老夫正爾拋書卧高興何人歎竹扉

三月二十五日懋魯攜酒東園看花

看花去歲竹闌邊今日花開恰似前抱病祇疑虛几杖  
逢人翻欲共周旋啼鶯落絮供長晝把酒論文及暮年  
來歲春光如復在行厨應許再開筵

鄭怡山春和樓

路斷平橋已廿冬登樓頻夢昔遺踪江雲繞棟經時薄  
山色回春到處濃入戶再看新壘燕隔溪還陰舊栽松

晨昏試扣長生訣門對高談得易逢

春前一日晴

歷改新年十日賒春陽今到野人家瓊葩著雨當軒放  
絲柳含風舞旆斜不語翩翩筵上燕長開灼灼勝中花  
西園試筆聊呼酒川上晴光動日華

招王詩人雪塘過小園看梅

闔閭詞客來婁曲楚楚梅花照碧潯白髮素心渾不改  
疎枝凍蕊自能禁孤山此日為幽伴浣水何時聽細吟

花遲東風長日掃  
莫愁荒草步難尋

宮詞

相喚簷前度嚶嚶  
柳外鶯寒衣裁未就  
忽斷剪刀聲

踏田夜歸遇雨

蕭蕭禾黍蘆蘆橫  
一望湖光廿里程  
夜半歸來眠不得  
北窓風雨帶秋聲

訪熊道芳不遇

雨深泥滑馬蹄艱  
策力行行到館邊  
深鎖綠楊人不見

鷓鴣啼斷夕陽天

題南坦扇畫

天畔松風捲夜濤  
朱衣坐看月輪高  
分明吏隱梅花水  
此意憑誰報水曹

乾寧驛

驛樓風勁捲塵沙  
天上樓船向海涯  
北望官河潮正長  
片帆拖影夕陽斜

蠶

篋笥開來紙半張  
星星萬點浴蠶香  
須臾湧出煙雲黑  
却問東鄰摘穉桑

萸菜

無日江湖不夢思  
秋風七月是歸時  
何人解得張翰意  
百尺柔條送紫絲

荅周秋汀

老去詩篇字字工  
蒼頭長日送詩筒  
夜來我亦驚詩夢  
聲落秋山寺裏鐘



石倉歷代詩選卷四百六十四

欽定四庫全書

集部  
石倉歷代詩選卷四百六十五

詳校官右中允臣薩敏

侍讀臣孫球覆勘

總校官進士臣朱

鈐

校對官編修臣盧

燧

謄錄監生臣劉

禮

欽定四庫全書

石倉歷代詩選卷四百六十五

明 曹學佺 編

明詩次集九十九

李承芳

悼亡

後圃鏡如圓前圃方如席戴春忘飢飭櫛髮免塗澤樹  
株工安排鴈驚行比立從宦未幾時高柯隱長戟物在

乃人亡食甘惟種核薤露何易晞春風總無色

懷侍御馬君思進

蜀道通天上長安近日邊夫君在何處魂夢苦相連詩  
句人傳道恩私骨擬鐫湖南多舊跡春草自年年

寄湖廣寧湖寺僧原亮

心自寒灰者身猶火宅棲龍眠歸鉢底虎負過溪西舊  
雨禪林在新松梵宇齊長風遞仙唄出世入岩溪

閒書用石室韻

懶似三眠柳，嬌癡各轉腰。  
偶移蹊徑步，聊赴野雲招。  
卉服染山翠，茶煙抹水消。  
箇中多藥石，休覓鹿門遙。

送李攻儀真省父用青蓮公江上吟韻

百分一棹空瓊舟，唱將離曲江水頭。  
蛾眉月光掃半淡，鷗羽風勢疾還留。  
子等待成千里驥，叔兮拚作一沙鷗。  
骨透煙霞疑出世，門傳組綬積崇邱。  
放筆興酣搖五岳，佩紉容臭耀中州。  
滕前為答尊翁道，山泉莫合江波流。

莆田柯容甫遺詩次韻奉答

求閒天肯為公賒塵外翛然別有家卧月靜憑仙篆石  
吟風緩曳短轅車菊餐籬落和清露荔熟園林咀絳霞  
流水慰君應不淺釣磯旋覺石稜加

春雪次息陰韻

盈盈端葉倚雲開挾得高寒入地來冰咽桃花浮斷澗  
風彈柳絮被粧臺瀟湘鴈去恩尤薄巴蜀波生信不回  
郢上更誰歌此曲典君為客獨高哉

石翁寄詩奉和見情

仙界詩篇我得歌  
苓脂丹鼎劖松蘿  
典刑奇服離塵甚  
魂夢長風度海多  
寺屬免歸聊復爾  
樵夫庭拜尚蹉跎  
一樣慟哭教焚却  
曾涉前年浦口波

都堂沈公寄詩白沙示世卿世卿偕余奉和

達人一例苦吟人  
渾渾唐風轉逼真  
薜荔山村詢野逸  
芙蓉秋水繪詩神  
仙臺玉笛梅花月  
民舍羅紉樹色春  
我赴東吳吟社約  
擬從東老結東隣

憲副沈公賜答前韻再重申和

山中習靜未忘言響接漁樵野曲喧鶴跡引來尋藥徑  
龍髯香抱種瓜園樹陰娛客頻蹲石山色隨僧半墮原  
滿戶晴雲團蓋宿填階黃葉任風掀

寄天與謝經歷

玉樹晴雲倚碧空謝家高格古今同閒時詩味梅邊雪  
清世官資柳下風苔襯山光侵屐綠花流溪曲泛觴紅  
春風不恨江南北夢渺池塘草色中

再次陳石翁韻

水調歌聯孺子歌紅蘅碧杜襯煙蘿惟應方寸塵須洗  
敢負滄浪水獨多僧偈或叅溫閒寂道書閒讀慰蹉跎  
沙鷗亦是雲煙翼蕩蕩青天浸綠波

依韻和答雷敏秀才

色色煙花染透身詩家今喜得新隣無機理即堪忘我  
不朽名應却累人茶臼敲風松葉響酒杯邀月竹根陳  
杜陵吟苦方成聖百偏推敲莫厭頻

送成都謝掾

楚國芙蓉折露妍  
贈詩色借蜀江箋  
文章日事乘槎使  
書畫虹光上峽船  
客路山青知己合  
公庭水淡足人眠  
相逢多是雲霄貴  
猶禮巖泉石榻禪

仙師山祖莊栽田次韻大崖

山墅為防枿棘籬  
石田攻苦勾芻茨  
宗公敦實貽謀舊  
孫子滋華食報遲  
髦士固從農子出  
白民因感聖王知  
揮毫亦著扶犁手  
擊壤狂歌樂不支

代食獨憐禾是寶祈年衆幸稼如茨戴星往駕雞聲早  
吟月歸鞭馬意遲咏撥畢逋資腹飽喚林布穀屬心知  
寧為若輩羸餘計聊展先公拜掃支

次韻答人

家住青山鄂渚東江楂曾宿虎溪中峰標蓮色孤僧致  
詩度松聲五老風羈旅吟期遊汗漫漁樵懶得話英雄  
鳬鷺既醉波光醪白石沙邊卧老翁

抱子卿弟長兒賦得鳴皋鶴志喜

流憩仙筇畫景遲庭階怡盼籜龍兒鶯聲嬌弄春蹊暗  
蛟影夷延秋水疑桂出一枝山更媚蒲成九節石應竒  
而翁易授精微旨汝伯詩為遠大期

與成都外郎石天祐

黃公山下茆蹊暝杜老江干草閣寒蜀客詩名原楚產  
涪翁譜跡擬都官遊心萬里天連水乘興孤舟雪漲瀾  
歸去上言兩知己濟衰應寄九華丹

送陳先生弟艮山還莆田

鴈行高翮排黃鶴魚岳崇邱借卧龍仙踏秋槐催卷近  
神資春草澤詩濃天推行色青相遠雲結離情翠且重  
九萬里程惟一日五千卷牘足三冬

題扇畫

巖石雲封道士家滿蹊青桂落寒花山童依帚那能掃  
也愛殘香醉露華

林見素致仕寄詩就用奉別

黃公山意足逶迤寄傲婆娑樹數枝最是寒風落岩桂

黃金多助甕頭資

縣主及諸公因事赴臬還寄意

江上歌吟一棹輕却疑身界狎蓬瀛瑤琴也度梅花調  
黃鶴來聽月下聲

次韻寄呈孔公老守

曲曲蘆灣釣艇輕紅塵渾是隔滄瀛捲蘆自製清笳曲  
吹入雲天落鴈聲

久不得酒

夜吟北斗挂簷陰  
朝步東籬菊色深  
歎息黃公山下水  
漁人不唱汨羅音

憶大崖

搖搖天外劇心旌  
鴻鴈南飛又北征  
五嶺三湘春草綠  
東風宜有杜鵑聲

到洪山

山待情人人故來  
柴桑心跡却相猜  
殷勤囑付新番雨  
為補經行半損苔

下山

一段風情畫得來悠悠道是虎溪回仙人來往仍無跡  
笑看僧堂香篆灰

李息陰遺衣以窄復還之詩以見意

山雲段段映襟裾城市凡情得掃除回首太顛滄海上  
一篇還累退之書

次大崖韻寄呈嚴丈人

夢裏鴉聲撲曉陽枕邊流水夜浪浪絲竿一點嚴灘月

家學漁樵不斷香

和雷敏秀才

夢魂化蝶寄流楂飛繞江蘋漠漠花長笛一聲驚忽醒  
蛟龍窟畔有人家

廣東徐僉憲朝文寄扇索詩於上次韻奉答

何物仙家為我歸珊瑚支瘦玉容肥江天當暑梅花落  
漫引寒風白鶴飛

子卿買田池次韻大崖

山下平田上池不妨沮溺是吾師  
縞衣淡月婆娑影  
笑領山妻歸去時

黃公山房約會卿不赴

放艇黃公山釣臺  
香風十里芰荷開  
看雲晝倦獨眠覺  
點點殘鴉晚樹回

望會卿值風

門前咫尺路行難  
駭浪乘風欲蕩山  
宛轉腸迴如九坂  
擬隨飛鳥過前灣

田汝霖

字深甫祥符人水南先生登父之弟

游僊詩

瑤池列僊真倪視凌蒼蒼下有洪波馳上有浮雲翔飛  
霓羅赤霄懸拱拂鳴璫珠箔流素烟海天照瓊漿飄飄  
弄雲霞裊裊翻霓裳須臾已千祀邈矣曷能忘

旅夕醉眠河張口

醉脫紫貂裘高眠酣素秋覺來楹外望山月挂銀鈎低  
頭無寶劍霜花流赤燄為學萬人敵鋒鋌久韜斂尚父

老垂綸孔明龍卧人一旦師王者寧復常賤貧我今何  
偃蹇薄海意難挽楊朱岐路悲阮籍窮途返咄咄行路  
難行行歌考槃吞聲尋趙魏立馬望燕韓

太白樓宴集

沈水流百折遙將淮泗通憑闌俯澄練千丈湛長空一  
線西北來窈窕入齊東中流連萬艇天際引孤篷秋風  
憶張翰把釣想任公共將千里目遙送兩征鴻飄飄歸  
海裔望望去無窮如何羈旅人安得羽翼叢乘雲訪赤

松登天攬六龍為我駐玄髮鍊液美姿容身將黃鶴侶  
心與白雲從豈能學長卿犢鼻歸臨邛

詠懷

白雲不歸山冉冉落窓牖蛟龍未上天且在潢污走嗟  
爾風雲徒本是塵埃叟尚父辭棘津囂囂向渭濱傾城  
齊拍手笑殺朝歌人青髮照青波策竿懸錦鱗一絲引  
周祚寸餌釣商辛風期感夢寐神與文王親非熊載後  
車八百衍經綸革命回天地寧知屬賤貧當年竟不偶

誰信席上珍際會有朝晏吐嗟傷我神

夜歸

夜從城市歸兒女歡相依村巷犬爭吠柴門燈火微  
栖雞在樹枝牛羊返郊畿禾黍幸登場非稔亦非飢  
自茲輸官餘聊足以免飢飢渴不足惜還喜願不違

紫團山人歌

紫團山人并州客北走燕雲南夢澤壯志真翹海岱雲  
逸思生風追李白邇來訪我梁王臺花朝月夜倒金壘

憑高醉擬菟園賦弔古誰憐司馬才知君學是子雲流  
甘泉獻賦未蒙收三年獨遶荆山哭四海空持寶劍遊  
彈鋏青門聊繫馬看花紫陌暫登樓幾經笛裏關山月  
盡是蘇卿六國愁五月黃河漭浩浩扣舷送子傷懷抱  
白浪龍門倒雪山黃雲磧石連烟草千載論交有孟韓  
山高天遠憶重歡臨歧把袂何為贈對酒惟歌行路難

宮人入道

妾身自侍昭陽殿錦幕雲屏朝復晏艷舞雲飄綺席香

嬌歌聲斷金壺箭金壺箭澀漏聲寒悶倚簾箏不忍彈  
鳳凰釵冷雲鬟濕翡翠羅輕玉骨單紅樓紫殿春將暮  
盧橘楊梅委墀路玉兔西沈不復東可憐春色夜朝露  
朝露纔晞霜霰濛梧桐金井落秋風妾身自念非金石  
敢望君恩歲歲同君恩自古誰能保願請瑤池弄瑤草  
吸露餐霞學駐顏青蛾皓齒年年好珠簾繡箔錦雲條  
側想鈞天奏玉璫暗解同心駕帳結竟隨玄圃鳳羣翔  
鳳翔飛入碧雲裏可憐鳴咽宮前水宮水東流竟不還

玉階琪樹空連理殷勤再拜囑宮官  
好向宮中奉御歡  
異日丹成昇碧落尚迎金蹕共驂鸞

公子行贈葛長伯東歸

隋楊凋綠陰梁菊綻黃金遊子朝來返東魯  
況兼鴻鴈揚哀音哀音噉噉斷河流齊川公子醉悲秋  
錦繡山河遊北宋烟花樓閣俯東周  
公有長才不自銜異骨峻嶒白玉面  
六籍胸藏滾巨濤萬言筆掃如驚電  
竭來結客梁王臺二三子者梁之才  
朝遊五帝三王園暮獵齊梁

苑苑開天馬戲驕驕腰裏非凡駟麟閣雲臺貌豈難蒲  
梢月國來非易我適高山采藥旋聞君遠別神愀然吳  
鉤寶劍耀秋煙為君沽酒夕陽天白鼻騮鳴柳絲牽柳  
絲牽行且休陽關三疊遏雲流佇看萬丈垂絲處早掣  
金龍碧海頭

題鮑氏舊山隱逸卷

廬江佳麗都舊山絕奇勝少小遨遊弱冠違夢迴往往  
雲蘿逕身羈韓魏未還家汴水梁園樂未涯春色隋堤

搖萬柳月明嵩少采三花三花采却覲仙都松子王喬  
啓秘圖神遊疊嶂迷三楚興繞蒼巖瞰五湖花戴紫芝  
隨意折酒挈銀瓶不用沽銀瓶醉倒舊山頭苦憶當年  
憩此邱迂紆蘿磴鹿呦呦窈窕巒光翡翠遊煙霞魂夢  
幾時酬歸去倘求雲壑侶與君齊跨二蒼虬

濱川草堂

五月麥秋禾黍高草堂虛豁對江臯歸來不挈東山妓  
日夕長吟弄彩毫太丘風格本殊調經綸卷作碧溪釣

富貴只將草露看  
醉來獨倚雲松嘯

圓明寺曉坐

曉起淨香焚禪牀  
坐入薰花燈三界  
寂鐘磬九天聞  
塔集苔前雨窟留  
鉢底雲迷方如有  
悟願此脫紛紜

過故沈丘王廢苑

寂寞何王苑  
荒涼廢寢孤  
月臨還玉砌  
風振自金鋪  
春暖狐交窠  
天昏鸛獨呼  
可憐臺下柳  
還對古城隅

贈莊生省覲歸江南

莊生歸省覲九月下揚州秋水孤帆遠白雲天際流嶺  
猿驚客夢楓葉戰鄉愁為報南華老逍遙海上遊

贈郁子南歸

離歌動竹扉客子振征衣遙憶吳江上霜清鱸正肥山  
中三徑好天外片帆歸只恐波濤濶魚竿拂少微

登太白酒樓贈別張大

樓對羣山起人隨世代遷不知千載下更得幾人傳孤  
鶩迷荒澤哀鴻下浦烟辭君挂席去淮海弄潺湲

太白樓贈肖齋呼子孟

二豪臨眺罷千古擅風流我輩同登日江山萬里秋風  
煙淮海色舟楫故園愁把酒凌倒影長歌憶舊遊

南京過舊內

寂寞金鋪閃參差玉陛留苑荒梁殿閣草綠晉山丘聖  
武歸中夏神功啓帝州可憐御河水嗚咽向東流

二

草創開皇極雄圖近紫微雲留三殿鎖水帶六朝扉芳

草迴羅綺幽花閉禁闌玉堦春欲暮猶自蝶翻飛

客有為余遠求金字蓮華經者作此酌之

仙人求梵策遠致紫金蓮潦水明秋日寒山帶夕煙蒼  
松迷閣道白馬度雲天歸去山堂裏應叅佛印禪

寓京元真觀酬史大梅

二月都門柳柔條已拂金相逢述舊事契濶幾傳音野  
寺松窻月江天竹塢琴向來行樂地追想意難任

贈律山隱者

幽人脫塵網，習靜坐壺天。  
萬籟流雲壑，千山響玉泉。  
林霞明夕浦，松露濕朝烟。  
永矢誰能悟，高懷迥自憐。

席上贈推官還太平

萬國朝天罷，孤臣返旆行。  
清秋看過鴈，落葉下高城。  
海岫臨淮出，江雲入楚平。  
定知先攬轡，早晚望澄清。

題蔡子彭塘別業

勝迹幽人賞，名區雅志便。  
竹崑深窈窕，石竇瀉潺湲。  
水色銜階綠，苔痕入徑鮮。  
為耽丘壑靜，松桂伴長年。

西亭書院偕孫東蒙宴集

不識王孫館，翛然水竹鄉。  
林堂秋黯黯，煙渚晚蒼蒼。  
雅會留孫綽，追陪愧子方。  
傳杯散圖史，餘興滿滄浪。

送人遊西山諸寺

珠林開寶刹，福地盡樓臺。  
神鬼虛堂靜，丹青畫壁開。  
飛泉天外落，獨鶴嶺邊來。  
恨不同君往，登臨謝俗埃。

御苑秋砧

露結金扉冷，霜淒繡幕深。  
寥羅出素手，乘月響清砧。  
高

入宮雲斷低隨閣漏沈無言為誰苦永夜助蛩音

宿惠公禪堂

曲徑幽齋不可尋  
禪扉行處竹陰陰  
客來深院無人語  
香裊空簾有磬音  
竟日懸燈元不滅  
中宵清梵忽微吟  
蒼苔白石青菁飯  
月滿東林興不禁

登古城弔令狐戰場

西風落日古城西  
禾黍搖搖故壘低  
寂寂飢烏歸野戍  
蕭蕭落木下寒溪  
斷雲陰雨還旌旆  
荒藪空林憶鼓鼙

最是江淮遺恨處  
睢陽東去草萋萋

贈郁黎陽昆季南歸

青楓江口葉方零  
獨客扁舟正杳冥  
坐入江籬牽浪碧  
晴看海岫削天青  
霜寒雲暝哀鴻雁  
浦淺沙高卧鶻鶻  
別後相思愁最處  
吳門梁苑夢初醒

宿清涼寺

寺倚山腰紺殿浮  
泉飛洞口白雲留  
臨窻星漢高寒逼  
掩逕藤蘿色相幽  
松月上時孤鶴唳  
嵐光深處暝猿愁

中宵清磬天邊落散入千巖水共流

秋興

宮梧殞翠下承明御水流寒繞帝京北極天連鷓鴣觀  
西山雲起鳳凰城露凝仙闕開金掌月照千門鎖玉衡  
惟有伶俚梁苑客旅魂零落不勝情

二

西苑迢迢隔御河遙瞻禁籞渺烟波天臨偏甸開仙仗  
日下平蕪散玉珂宮漏漫從三殿報爐烟別向九霄多

近臣更有承恩處  
龍舸時聞瓠子歌

三

丹梯萬仞倚天迴  
憶踏梁王古吹臺  
三楚南連嵩岳迥  
五雲西接太行來  
且看詞賦懸霄壤  
莫歎鄒枚盡草萊  
一別故園驚歲暮  
黃花白酒向誰開

天王寺春望

招提春望盡烟霞  
綠竹青松老衲家  
門對三山紆宋苑  
碑傳二帝狩關  
雲邊虛閣流清磬  
樹裏寒僧演法華

人代幾迴登眺處空餘輦道夕陽斜

秋興

秋風颯颯起天涯萬事傷心兩鬢華  
久客有貧同季子匡時無路弔長沙

寫懷

洛客病餘淹鄴浦故園消息阻河關  
窮愁荏苒年華易世味蕭條旅況閒

石倉歷代詩選卷四百六十五